

Xabier Pérez Igrexas, en calidade de Portavoz do Grupo Municipal do Bloque Nacionalista Galego (BNG) no Concello de Vigo, ao abeiro do establecido no Regulamento Orgánico do Pleno e da restante normativa aplicábel, eleva ao Pleno da Corporación para o seu debate a seguinte

MOCIÓN

*PARA UTILIZAR OS REMANENTES MUNICIPAIS PARA A ATENCIÓN
DAS NECESIDADES REAIS DA CIDADE*

EXPOSICIÓN DE MOTIVOS

O Concello de Vigo concluíu o exercicio fiscal 2023 cun remanente líquido de tesourería por acima dos 213 millóns de euros, tal e como se recolle na conta xeral aprobada pola Xunta de Goberno Local. Trátase dunha inxente cantidade de recursos que teñen orixe na inexecución estrutural e record dos sucesivos orzamentos municipais e, xa que logo, do reiterado incumprimento dos compromisos do Goberno municipal de Abel Caballero e a desatención das necesidades reais das viguesas e dos vigueses. Non é aforro, nin eficiencia, é a demostración obxectiva e palpábel da incapacidade do actual executivo local e da súa xestión de inercia e desleixo. Son recursos achegados polas viguesas e vigueses que pola falla de acción do Goberno municipal non retornan, en forma de políticas públicas, á cidadanía.

O máis que previsíbel levantamento da suspensión das regras fiscais nos vindeiros meses supón unha ameaza real de que eses recursos da cidade acaben novamente incautados e inmovilizados.

É preciso, pois, poñer en marcha os mecanismos orzamentarios para a incorporación deses remanentes e a súa utilización en favor do interese público xeral, alargando e fortalecendo os servizos públicos municipais, enfrontando o grave problema do acceso á vivenda e o empobrecemento social, promovendo o emprego e apoiando ao comercio de proximidade, revertendo as políticas de desertización cultural e de maltrato ao deporte vigués, despregando esforzos reais para avanzar na protección ambiental e combater os efectos da situación de emerxencia climática e, tamén, poñendo fin ao deliberado abandono que padecen os barrios e parroquias.

Urxe facelo coa maior celeridade para posibilitar a execución das actuacións que se vaian financiar a cargo deste crédito extraordinario evitando seguir alimentando a bola de neve que nos últimos anos provocou unha acumulación sen precedentes de recursos sen gastar.

Polo que, a través desta moción, o Bloque Nacionalista Galego propón ao Pleno a adopción dos seguintes

ACORDOS:

Instar o Goberno municipal a iniciar coa maior axilidade o procedemento para a incorporación nos orzamentos municipais de, como mínimo, **100 millóns de euros** dos remanentes líquidos de tesourería dispoñíbeis no Concello para os destinar a, entre outros, os seguintes usos e aplicacións:

1. Creación e posta en marcha dunha Axencia Local de Vivenda Protexida e Social, como instrumento para a promoción directa por parte do Concello de Vigo de vivenda a prezos asequíbeis nomeadamente para alugueiro social e o apoio ao cooperativismo de vivenda. **25 millóns de euros.**

2. Posta en marcha dunha Estratexia Local contra a Pobreza e o Empobrecemento que inclúa, entre outras medidas, a creación dunha Renda Social Municipal, compatíbel con outros recursos asistenciais. **10 millóns de euros.**
3. Aumentar a dotación do Plan Municipal de Emprego. **3 millóns de euros.**
4. Despregar, coa participación directa do movemento veciñal na súa definición, un Programa Plurianual e Extraordinario de Investimentos para a Atención de todos os Barrios e Parroquias (PLAN CIDADE), para os vindeiros tres exercicios. **20 millóns de euros (primeira anualidade).**
5. Rehabilitar a antiga fábrica da Compañía Viguesa de Pinturas, de titularidade municipal, para a súa conversión na Fábrica Cultural de Teis, como un espazo destinado á promoción da creación artística na cidade. **1,5 millóns de euros.**
6. Desenvolver a Rede municipal de bibliotecas de barrios e parroquias abrindo 5 novas bibliotecas (con fondos e persoal bibliotecario) en Teis, Valadares, Navia, Coia e Lavadores. **5,5 millóns de euros.**
7. Apertura dous novos Centros de Información ás Mulleres en Coia e Teis. **2 millóns de euros.**
8. Posta en marcha dun programa de mellora da infraestrutura e equipamento das instalacións deportivas municipais. **3,5 millóns de euros.**
9. Reapertura dos espazos xuvenís Súbete ó Castro e Punto Xove, así como recuperación de servizos na Casa da Xuventude e dinamización do Vigosónico. **1,5 millóns euros.**

10. Programa de axudas para a prevención dos incendios, reforestación e valorización do monte comunal, que inclúa entre outras accións a execución do anel verde impulsado pola Mancomunidade de Monte sen Man Común. **8 millóns de euros.**
11. Plan Municipal de resposta á emerxencia climática. **3 millóns de euros.**
12. Creación de 5 novas escolas infantís municipais, para a súa entrada en funcionamento o curso 2024-2025, en Balaídos, Calvario, Teis, Navia e Centro. **6,5 millóns de euros.**
13. Apertura de 2 novos centros cívicos municipais nos barrios do Calvario e Navia. **1,5 millóns de euros.**
14. Despregamento dun Plan integral de impulso do comercio polo miúdo e de proximidade de Vigo. **4 millóns de euros.**
15. Axudas aos centros educativos públicos da cidade para a mellora da infraestrutura escolar, patios e espazos deportivos. **5 millóns de euros.**

Vigo, Galiza, 20 de febreiro de 2024.

Asdo.



SR. ALCALDE-PRESIDENTE

CONCELLO DE VIGO